

# WAKITÀ UWANA POL ATSETSÈR À AZLA EFESƏYA Lettre de Paul aux Eph'esiens

## *Ayyi*

<sup>1</sup> Gi Pol la uwana gətsetser wakità uwanay, à gi uwana Zəzagəla akəsàni gi, kà gi ana magay masləlay aña Yesu Kristu. Gəsləl à akul à awtày, akul azlaməna masla gay Zəzagəla la Efesus, akul uwana kadiñaw gəl à Yesu Kristu à vok, ñgaha akul uwana kagaw tekula la masla la abà.

<sup>2</sup> Zəzagəla Baba gami, la Sufəl gami Yesu Kristu tapisakulla gay à vok ñgaha la mav à akul lapiya.

*Tatak delga uwana Zəzagəla avà à tsəhay aña.*

<sup>3</sup> Məzləbà Zəzagəla Baba aña Yesu Kristu gami! Uwana apis à anu gay à vok la mav à anu tatak gesina, uwana la zagəla, la makoray aña la abà, avà à anu uwana kà, kà uwaga mədahama gay à vok la Yesu Kristu.

<sup>4</sup> Zəzagəla atsatsàmàni anu la Yesu Kristu dagay uwarà, à mok uwana aləg mađàh gudəñ à vok kà, kà anu aña magay azlaaña, kokuđa mawisiga la huma aña bay.

<sup>5</sup> Kà uwana awoya anu, akəs kà mapakanula kà azlabəza aña kà sləray uwana Yesu Kristu adahàn. Akəsəl à gəl, à uwana adahàn kiya uwaga.

<sup>6</sup> Adfahàn̄ kiya uwanay kà, kà anu aña mazləbəy kà vok mahamay aña, kà uwaga dzəba aña səla aw. Avà à anu kà deyday pəra, kiya uwaga kà, uwana mədagay tekula la bəzi gay ləv aña ndzer.

<sup>7</sup> Kà uwana adapalla anu la aņiz aña Kona aña uwaga, adamatsan tsakana gami ala, ŋgaha apəhanula məŋ vok mahamay aña.

<sup>8</sup> Avà à anu vok mahamay la mahənla la pawasla, bokuba magod̄ay kà, apakànula kà azlaməna matsihila gə, adfahàn̄ kiya uwaga kà, kà anu aña masəlay han̄kəli aña à tsəh.

<sup>9</sup> Apəhanula tatak mahad̄ vok à ahəŋ gə, uwana uwarà asəl madəhəŋ, tatak uwana adzüğw madəhəŋ la Yesu Kristu.

<sup>10</sup> Madzugway aña kà, mok uwana kaslə adəslyay kà, adahama gay azlatatak uwana à vok la zagəla la uwana la vəfah, kà Yesu Kristu aña magay Sufəl lakəl aña.

<sup>11</sup> Zəzagəla adfahàn̄ azlatatak gesina bokuba uwana asal madəhəŋ, kiya uwaga atsatsəmən̄i anu dagay uwarà, bokuba uwana asa à gəl aña, kà anu aña magay azlaaña. Kiya uwanay mədahama gay à vok la Kristu, mədabəza humə mazuw gəy gami,

<sup>12</sup> kà azladza aña mazləb mən̄ga aña. Anu, anu azladza matera uwana məvə ləv gami à Yesu Kristu,

<sup>13</sup> kà aņkul kà, kiya uwaga babay. Katsənəw gay dziriga, uwana gay marabəŋ, la uwana Zəzagəla abəlla akul, kavəw ləv aņkul à Yesu Kristu, kadfahəwwəŋ kiya uwaga kà, kà uwana

kahamàw gay à vok la masla. Zəzagəla adanah à akul masəlay aḡha à vok, masəlay uwaga kà, kà Masasəđok tsikasla uwana apəh à ahəḡ uwarà.

<sup>14</sup> Avà à anu Masasəđok dagay uwarà, ḡgaha apəlla ala kà mədàbəz dèwdèw tatak, uwana apəh à azlatsəhay aḡha à ahəḡ. Mədàbəzal la vudf uwana Zəzagəla adàbəl anu aḡa tetuwa. Məzləbà Zəzagəla uwana mənḡa!

### *Madəv kuda aḡa Pol*

<sup>15</sup> Kà uwaga à uwana, kikay ḡḡodfay à Zəzagəla kà aḡkul. Ḡətsənà mad à huma à gay aḡkul la madiḡ ḡəl à Sufəl Yesu Kristu à vok à abà, ḡətsənà mawoy azlaməna madiḡ ḡəl à Zəzagəla à vok aḡkul bay.

<sup>16</sup> ‘Kikay’, ḡḡodf à Zəzagəla koksikoksi kà aḡkul, à baḡa ḡədəval kuda.

<sup>17</sup> Ḡədəv kuda à Zəzagəla Baba mənḡa, Zəzagəla ḡà, la uwaga à uwana Sufəl Yesu Kristu adàhla sləray aḡha, ḡədəval kuda, kà masla aḡa matapakakulla matsihila aḡha, ḡgaha masla aḡa mav à akul maslay la ḡuləm aḡa masəl masla.

<sup>18</sup> Ḡədəv kuda à Zəzagəla kà masla mapəzl akul haḡkəli aḡkul la udfaka aḡha, kà akul aḡa manəḡ makəđ ḡəl à ahəḡ aḡa tetəvi, uwana akul kadàbəzaw à abatà, katsənaw maḡay mənḡa aḡa makoray aḡha, la azlanadzipo uwana adahàḡ à ahəḡ, kà aḡa azladza aḡha gesina.

<sup>19</sup> Asa à gi babay kà, kasəlaw mənḡa aḡa ndzədfa aḡha, kà aduwa tatak gesina, bokuba uwana ndzədfa aḡha adàh sləray la anu la abà,

anu uwana mədiŋ gəl à masla à vok. Ndzəfa kà bə uwatà.

<sup>20</sup> A uwana adəh sləray la Yesu la abà, awùlla à uda la mamətsay. Mok uwana adawùlla à uda la mamətsay kà: “Adzà madzay la ahəl kaf gulo lakəl”, Zəzagəla agədəl “la zagəla.✧

<sup>21</sup> Kagay Sufəl lakəl aŋa azlatatak gesina, lakəl aŋa azlamalika la azlasufəl aŋatà, ŋgaha lakəl aŋa azlatatak gesina, uwana atà la ndzəfa la zagəla bay.” Masla la uwana aduwa atà. Aga Sufəl lakəl aŋa azladza gesina, baməraka tadagay azlauwi, aga lakəl aŋa azlauwana la gudəŋ uwanay la vok babay, ŋgaha lakəl aŋa gudəŋ à vok, uwana adàsa à waŋ la huma aya bawbaw.

<sup>22</sup> Zəzagəla abək tatak gesina à tsəh asik aŋha, apakəŋ ala kà Sufəl lakəl aŋa tatak gesina, ŋgaha agəŋ madzahaga aŋa azlaməna gay Zəzagəla.✧

<sup>23</sup> Maham à ahəŋ mənə gay Zəzagəla kà, vok aŋa Kristu, la uwaga la abà la uwana, masla apəhla vok ala la paraka, ŋgaha azlatatak delga gə gesina kà, aga kà la masla la abà.

## 2

### *Dagay mamətsay tsəràh à sifa*

<sup>1</sup> Mok uwana uwarà kà, akul kà bokuba akul azlamamatsayga la sifa aŋkul la abà, kà uwana kadəhəhəwwəŋ kà tsakana.

<sup>2</sup> Kanəfəw madəhəŋ aŋa azladza gudəŋ à vok uwanay, kanəfəw sufəl aŋa azlamasəfok

---

✧ 1:20 1.20 Mahabay 110.1 ✧ 1:22 1.22 Mahabay 8.6

mawisiga uwana seteni, aga la ndzəfa la tataka aŋa zagəla la abà la kutso. Masla la uwana adàh sləray la azladza uwana la abà takweska Zəzagəla.

<sup>3</sup> Anu gesina kà, məgà bokuba atà babay à uwarà, məfahəŋ kà dèwdèw tatak mawisiga, uwana asà à ləv gami koksikoksi. Məzləbàh kà gəl gami pəra. Kà uwana məgà kiya uwaga kà, anaka seriya aŋa Zəzagəla atəf à anu à gəl bokuba à azladza anik babay.

<sup>4</sup> Ama lagwa kà, kiya uwaga aya aw. Hərəz kà, vok ahamà Zəzagəla mənğa kà, anu kà mapəlla vok mahamay aŋha ala.

<sup>5</sup> Baməraka mədagay bokuba azlamamatsayga la tsakana gami la abà, masla kà avà à anu sifa adəv à gay aw, uwana la Yesu Kristu la abà. Abəl akul kà deyday pəra.

<sup>6</sup> Kà uwana mədagay tekula la Yesu Kristu, awùlla anu à uda la mamətsay, abək anu à zagəla, kà anu aŋa makoray la slaka gə la Kristu.

<sup>7</sup> Adfahəŋ dzəba aŋha səla aw, kiya uwanay kà, kà ahəl aŋa Yesu Kristu, kà mapəlla ala la azlakaslà uwana la abà, adàsa à waŋ la huma la gay, kà vok mahamay aŋha kà mənğa. Aduwa tatak gesina.

<sup>8</sup> Zəzagəla abəl akul, kà uwana kadiŋaw gəl à masla à vok. La madfehəŋ kiya uwaga, abəl anu deyday, awkà kà madfehəŋ aŋkul aw. Avà à akul mapis gay à vok aŋha deyday aya.

<sup>9</sup> Zlahaw kagodfaw kà, kà uwana məfahəŋ sləray delga, kagodfaw zlà kà. Avà kà deyday, dza atsa zlapay aw.

<sup>10</sup> Aga kiya uwanay, kà uwana masla la uwana adahà à anu. Avà à anu sifa mawga la Yesu Kristu, kà azlatatak delga la sifa gami la abà, delga uwana adahàn à ahən kà dagay uwarà kà anu anja madəhən.

### *Mədahama gay à vok la Yesu la abà*

<sup>11</sup> Kà uwaga kà, gəwulla à akul à gəl, akul azladza uwana azla Yahudiya aw, dagay la mayyi akul, à akul, azladza uwana makadav atà à uda gə kà, tazala à akul ala kà: Akul azlamakadav à uda gə aw. Ama tapəhay kà lakəl anja tatak uwana la uda gə pəra, à uwana azladza tadəhən à vok anatà à vok pəra.

<sup>12</sup> Awul akul à gəl kà, la kaslà uwatà, kagəw kərkər la Kristu, uwana mafal dzakwa à gəl gə, kagəw azla Isərayel aw. Zəzagəla akəs vok slawda la tsəhay anja, la uwana la abà apəh à atà à ahən kà anja madəhən, ama akul kà, tatüğw la akul aw, kà uwana akul azladza à uda, tatak la ahən, à uwana kafawal yewdi à tsəh la uwaga la abà aw. Kagəw la gudən la vok, ama kasələw Zəzagəla aw.

<sup>13</sup> Uwarà kà, kagəw kərkər la Zəzagəla. Ama lagonay kà, kahamaw gay à vok la Kristu. A masla uwana asòkw aniz anja à vədah kà akul, kità kà, akul kərkər la masla aya aw.

<sup>14</sup> Kikay kà masla à uwana masəl vok la ahən la tataka gami la abà. Dagay uwarà azla Yahudiya la azladza uwana azla Yahudiya aw tavàhàla. Ama masla la uwana apakànula tsəhay tekula, madəguva la ahən uwarà la tataka gami la

abà, bokuba zlagam. Masla akalàh à ahəŋ, la mamətsay aŋha.

<sup>15</sup> Mapəhay aŋa azla Yahudiya agod: ‘Dahəŋ uwanay, uwanay’, ama masla azəŋ ala. Adahəŋ kiya uwaga kà, kà masla aŋa maham gay azla Yahudiya à vok la azladza uwana azla Yahudiya aw. Tagay tekula la masla la abà tadasəl vok,

<sup>16</sup> kà uwana aməts à ahəf à adi, madəguva la ahəŋ la tataka aŋatà la abà aya aw, adazəb à uda. Kikay kà masla adapakatàla kà tsəhay aŋha, ŋgaha adasəl atà vok.

<sup>17</sup> Asà à waŋ à gudəŋ à vok, kà mazakulla gay marabəŋ, akul uwana akul azla Yahudiya aw kagəw kərkər la Zəzagəla uwarà, lagonay kà kabəzəwwal lapiya. Ŋgaha à anu azla Yahudiya, uwana məgà nekwa la slaka Zəzagəla mədabəz lapiya babay.\*

<sup>18</sup> Gəgod kà anu azla Yahudiya, la akul uwana azla Yahudiya aw, kà anu ŋgaha akul bay, mədabəz tetəvi la Kristu la abà kà anu aŋa maz vok à slaka Zəzagəla. Masasəfok tsikasla azlak à akul, bə Masasəfok gə la uwaga azlak à anu babay.

<sup>19</sup> Kità kà, akul azlaməlok aya zlà ma aw. Akul azlaməna mas à waŋ la uda aya aw. Akul azladza gudəŋ adagay, bokuba azladza anik, uwana azlaaŋa Zəzagəla, akul la huf gəy aŋha adagay.

<sup>20</sup> Akul kà bokuba akul azlaakur uwana tahazlla gəy, matatukw gəy kà azlaməna asik, la azlaməna mapəh à atà gay ahəl kà mapahəh à

---

\* 2:17 2:17 Yesayya 57:19

azladza, ɲgaha Yesu Kristu la gəl aɲha kà, akur mawad̄ gày, akəs azlaanik.

<sup>21</sup> Kà masla la uwana, gày adza à ahəɲ la afik, ɲgaha azala vok à gəl akul la azladza anik babay kà, kagaw kà bokuba gày uwanay Sufəl Zəzagəla adza à ahəɲ la aku.

<sup>22</sup> Kà uwana kahamaw gay à vok la Yesu Kristu, akul babay la azladza anik kà, bokuba gày uwanay la uwana la aku Masasəḏok Zəzagəla adza à ahəɲ la aku.

### 3

*Zəzagəla ayàh kà Pol az gay marabəɲ à azladza uwana azla Yahudiya aw*

<sup>1</sup> Kà uwaga à uwana gəpəh à akul kà, gi Pol gədav kuda à Zəzagəla kà aɲkul. Gi la daɲay kà Yesu Kristu, tawàḏà gi kà akul, uwana azla Yahudiya aw.

<sup>2</sup> Təga kà, katsənàwwàɲ kà Zəzagəla afà gi à ahəɲ, kà gi aɲa maḏàh sləray kà aɲkul. Kà vok mahamay aɲha à uwana gəḏəhəɲ kiya uwanay.

<sup>3</sup> Zəzagəla apəhgəla tatak mahadəɲ à ahəɲ gà, nasiri uwana uwarà, kà gi aɲa masəlay. Gəda-tsetser à akul lakəl aɲa nasiri uwaga ɲuv.

<sup>4</sup> Aɲɲà, kadzeɲaw uwaga kà, kadatsenaw nasiri uwana gəsəl lakəl aɲa Yesu Kristu.

<sup>5</sup> La məl uwana la abà, adada à lig kà, Zəzagəla apəhla tatak uwaga à azladza aw. Ama lagonay kà, adasləl Masasəḏok aɲha à waɲ kà mapəhla à azlaməna maz gay aɲha, la à azlaməna mapəh à ata gay ahəl kà mapàh à azladza uwana abək atà à fəta à awtày kà azlaaɲha.



<sup>6</sup> Aganay tatak uwana mapəhla ala gà: Uwana Zəzagəla avà à azla Yahudiya bokuba ləmana kà, akul uwana akul azla Yahudiya aw kà, kadà-bəzawwal babay suwan: Akul la azla Yahudiya kà, kagaw tekula. Tatak uwana Zəzagəla apəh à ahəŋ, kà mav à azladza, uwana azlaaŋa Yesu Kristu kà, adavà à akul babay. Azlatatak uwaga kà, tasà à uda kà la gay marabəŋ la abà.

<sup>7</sup> Vok ahamà Zəzagəla, azəb gi à sləray aŋha à abà, kà gi aŋa maz gay marabəŋ uwanay à azladza. Adahà uwaga kà la maslay aŋha.

<sup>8</sup> Gi masla mazəb dagum aŋa azlaməna madiŋal gəl à vok anik gesina, bə la uwaga bay kà, Zəzagəla akəs à gi, kà gi aŋa maz gay marabəŋ, uwana asà à uda la ahəl aŋa Yesu Kristu, à azladza uwana azla Yahudiya aw. Ləmana uwaga kà, məŋga zəŋzəŋ, kà matsəŋəŋ à uda aŋa azladza.

<sup>9</sup> Masla la uwana avà à gi tetəvi kà mapəhla à azladza gesina lakəl aŋa tatak mahadəŋ à ahəŋ gə, uwana uwarə Zəzagəla apəh, adapaka vok. Zəzagəla la uwana aŋaləh azlatatak gesina, adahà tatak uwaga à ahəŋ la yewdi aŋa azladza, tsərah à lakana.

<sup>10</sup> Lagonay kà, Zəzagəla adapəhla ala la tataka azlaməna madiŋal gəl à vok la abà, kà azlamalika la azlasufəl aŋatə tadənəŋ azlaməna madiŋal gəl à vok, ŋgaha atə aŋa masəl matsihila aŋa Zəzagəla. Kà uwana matsihila aŋha kà gərgər la azlatetəvi anik anik.

<sup>11</sup> Kiya uwaga adahəŋ bokuba uwana ayəh madehəŋ, à mok uwana gudəŋ à vok aləg madzəka à vok dadəŋ. Apəhla uwaga ala la

magola la ahəl aña Sufəl gami Yesu Kristu.

<sup>12</sup> Kà uwana anu azlaaṅa Yesu Kristu, ṅgaha mədiṅ gəl à masla à vok kà, mədàza vok à slaka Zəzagəla la kokuda kurit yewdi.

<sup>13</sup> Tsa Zəzagəla adadehəṅ kiya uwanay kà, gədəv à akul kufa, kà ləv aña mavalay akul à gay, kà uwana gəs ṅgərpa kà akul, aw. Azlauwala kà à vok, kà akul karabaw kà dza uwana as ṅgərpa kà akul, haday.

### *Masal aña Yesu*

<sup>14</sup> Kà aña azlatatak uwanay gədapəh à akul kà, gədəv kufa à Zəzagəla la makədəf à ahəṅ, ṅgaha la iyaw tugwi kà aṅkul.

<sup>15</sup> Ndzer, Baba uwanay kà, Baba aña azladza gesina uwana la zagəla, ṅgaha la azlauwana la vədah.

<sup>16</sup> Ndzer kà, masla kà la mazləbay, akoray gesina. Kità kà, gədəval kufa kà, kà Masasəfok aṅha aña mav à akul ndzəfa, kà akul aña magay la ndzəfa la ləv aṅkul la tsəh.

<sup>17</sup> Gədəval kufa babay, kà Yesu Kristu aña madz à ahəṅ la ləv aṅkul la tsəh, kà uwana kadiṅaw gəl à masla à vok. Gədəval kufa babay, kà akul aña mawoy vok akul à akul. Baṅa kawoyaw vok kà akul à akul, mawoy vok aṅkul adəgay la ndzəfa, bokuba ahəf uwana adahàla slilih aṅha à tsəh iyaw, ṅgaha bokuba gəy uwana atsizl à matatukway à afik lela.

<sup>18</sup> Kiya uwaga akul, la azlaməna gay Zəzagəla anik gesina kà, sələw kà Yesu Kristu awoya anu kaykay. Baməraka kadədaw à uwali, kadədaw

à zagəla, kadàdaw à afik à agu kà, mawoy akul aṅha kà, bà aga la ahəṅ la abatà.

<sup>19</sup> Gədəv kufà à Zəzagəla kà, kà akul aṅa masəl mawoyəṅ aṅha, uwana məslala vok aṅa matsənəṅ la paraka dadəṅ aw. Kà azlatatak uwana tahəṅ Zəzagəla ala, aṅa mahəṅ ləv gami ala suwəṅ.

<sup>20</sup> Zəzagəla kà, aslala vok aṅa madəh tatak gesina. Aduwa gesina, uwana mənaval kà madəhəṅ, aduwa madzugway gami gesina, adəhəṅ kà la maslay aṅha, uwana adəh sləray la anu la abà.

<sup>21</sup> Məzləbà masla, anu azlaməna maham à ahəṅ məna gay Zəzagəla gesina, ṅgaha Yesu Kristu bay. Məzləbà masla koksikoksi aṅa tsərəh à awtəy! Amen.

## 4

### *Vok aṅa Yesu Kristu kà tekula*

<sup>1</sup> Tsa kiya uwanay kà, gədəv à akul kufà, kà uwana tadùw gi à daṅay kà sləray aṅa Sufəl Yesu Kristu, uwana gədfəhəṅ. Kamkam gətuwa à akul à vok kà matuway kà, nəfəw maday delga à uwana Zəzagəla azaləkulla.

<sup>2</sup> Gàw tələmna lela, gàw azladza delga, gàw azlaməna mabasiṅ, wəyàw vok akul à akul, ṅgaha basəwwəṅ vok kà akul à akul babay.

<sup>3</sup> Wədfəw vok à uda kà madz à ahəṅ la tekula la abà, bokuba uwana Masasəfok apakənula tekula, ṅgaha dzəw à ahəṅ la lapiya la abà la tataka aṅkul la abà, kà akul aṅa magay tekula.

<sup>4</sup> Maham à ahəŋ mənə maɗiŋal gəl à vok bokuba vok aŋa Kristu, vok tekula pəra. Nŋaha Masasəfok bay, kà tekula pəra. Tatak uwana Zəzagəla azalànula kà, anu aŋa maduwal à adi kà tekula pəra babay aya.

<sup>5</sup> Sufəl gami Yesu kà tekula, maɗiŋal gəl à vok gami kà tekula, nŋaha tetəvi aŋa batem bay kà tekula.

<sup>6</sup> Zəzagəla kà tekula pəra, uwana masla Baba aŋa azladza gesina. Akoray lakəl aŋa tatak gesina, aga la slaka gesina, aga la azlatatak gesina la abà babay.

<sup>7</sup> Kəla uwabeyuwi gami gesina abəzal mavəy la aŋha la aŋha, bokuba uwana asa à Yesu Kristu, avà à anu.

<sup>8</sup> Uwaga bokuba uwana tatsetsèr à wakità Zəzagəla à abà, tatsetsèr lakəl aŋa Kristu kà: 'Mok uwana adada à afik à zagəla kà, akəɗàsl azlaməna məzam aŋha, ahahay atà à tsəh, adàla atà à afik bay. La lig la ahəŋ avəh azlamavəy à azladza la gudəŋ la vok.'<sup>✧</sup>

<sup>9</sup> Haɗay, la magoɗay: Maɗay à zagəla, mana asal magoɗay ma? Uwaga asal magoɗay kà, asà à vəɗah tsərəh à kutso à abà dadəŋ.

<sup>10</sup> Dza uwana asà à abanay à vəɗah kà, bà dza gà la uwana ahəd à zagəla. Amatsikakadɗay aŋa zagəla à afik, kà masla aŋa makoray lakəl aŋa azlatatak gesina.

<sup>11</sup> Masla la uwana avəh azlamaslay à azladza. A azlaməna masləlay anik avà à atà maslay, kà mad maz gay aŋha. A azlaanik mapəh à atà gay ahəl aŋa Zəzagəla, kà mapəh à azladza, à

<sup>✧</sup> 4:8 4.8 Mahabay 68.18

azladza anik bay, avà à atà maslay kà maz gay aṅha à azladza uwana tasəl Zəzagəla aw. A azladza anik bay, avà à atà maslay kà manəṅla azlamaham à ahəṅ məna gay Zəzagəla, ṅgaha azlaanik babay kà, avà à atà maslay kà matapla azladza anik.

<sup>12</sup> Avàh sləray uwaga kiya uwaga, kà masla aṅa madàh azlaməna gay Zəzagəla à ahəṅ, kà madàh sləray aṅha, kà maham à ahəṅ məna gay Zəzagəla uwatà à vok aṅa Kristu aṅa mad à huma à gay.

<sup>13</sup> Ada à huma à gay la mawad vok à uda kà, tsəràh à uwana anu mədàgay tekula, kà uwana mədav ləv gami à Yesu gesina, ṅgaha gesina gami məsəl masla. Kiya uwaga mədàgay azlazil, mədàgay sətaka bokuba Kristu bay.

<sup>14</sup> Kità kà, la kaslà uwaga mədàgay azlabəza aya aw. Azlaməna mapapatàh dza uwana tapapatàh à azladza la dəmdəm aṅatà kà, la azlagay aṅatà uwana tapapatanula, tadàza anu à tetəvi à tsəh la matapanula aṅatà aw, bokuba uwana afađ abəlak kəslah iyaw, wùlà à abanay, wùlà à abanay lakəl iyaw aw.

<sup>15</sup> Məga kiya uwaga aw, məwoya vok kà anu à anu, ṅgaha məpàh vok dziriga la tataka gami la abà, kà anu aṅa magay bokuba Yesu ndzer, à masla uwana lakəl gami la afik gesina.

<sup>16</sup> Masla la uwana abək azladza à ahəṅ gesina, kà atà aṅa magay tekula bokuba vok aṅa dza uwana atsà vok la azlaamil. La vok aṅa dza kà kiya uwaga babay. Baṅa azlamanabay aṅa vok tadàh sləray aṅatà lela kà, vok gesina azigənay lela. Kiya uwaga babay la maham à ahəṅ məna

gay Zəzagəla, baña azladza tawoya vok kà atà kà atà kà, maham à ahəñ uwana vok aña Kristu kà, agay la ndzəda kaykay.

*Sifa mawga la Kristu la abà*

<sup>17</sup> Tatak uwana asa à gi mapəhay kà gəpəhay la sləm aña Sufəl, gi gədañ à afik la magodəy kà, kanəfaw tetəvi uwana azlauwana tasəl Zəzagəla aw tanəfay aw, kà uwana atà kà tadzugway kà azlatatak deydayga pəra.

<sup>18</sup> Madzugway añaatà kà mələs gà. La huma aña sifa mawga, uwana Zəzagəla avəy kà, atà kà bokuba azlaməlokga, kà uwana atà la gəl dzañ-dzaña hawhahaw, ɲgaha kiya uwaga kà tasəl tetəvi aña Zəzagəla aw.

<sup>19</sup> Zirui añaatà la ahəñ aw, tavà vok añaatà kà azlatatak mawisiga pəra, ɲgaha tatsizl à ahəñ aw.

<sup>20</sup> Kà aɲkul kà, Kristu atəpakulla kiya uwanay aw.

<sup>21</sup> Masla la uwana kakəsəwwalla gay la ahəl ala aw takay? Akul uwana kahaməw gay à vok la Kristu kà, tatəpakulla azlatatak delga, uwana apəhànula uwaga aw takay?

<sup>22</sup> Tsa baña kiya uwanay kà, kanəfaw tetəvi, uwana kanəfəhəw uwarə aya aw. Tsòkw vok ala, kiya matsokw makatsekatsa la vok ala, kà uwana tetəvi uwaga kà awis akul ala, kà uwana kawò-yəhəw azlatatak mawisiga la mapapat gəl aɲkul.

<sup>23</sup> Vəw tetəvi à Zəzagəla, kà mazəb madzugway aɲkul, ɲgaha la ləv aɲkul aña magay mawga.

<sup>24</sup> Nəfəw tetəvi mawga uwana Zəzagəla adahəñ à ahəñ kà aña magay kiya masla. Kiya

matsokw lukut mawga à vok, kà uwana tetəvi uwatà kà dziriga, akəs à Zəzagəla à gəl.✧

<sup>25</sup> Kiya uwaga kà, kadəhaw fida aya aw, pəhàw kà dziriga la azladza anik pəra, kà uwana anu gesina mədagay tekula.✧

<sup>26</sup> Baņa kapakàw ləv kà, dəhàw haŋkəli kà mapak ləv adala akul à madəhəŋ mawisiga à abà aw. Baņa kadapakaw ləv, kadzaw à ahəŋ tsəràh à matəf à ahəŋ afats aw.✧

<sup>27</sup> Kavàw tetəvi à seteni aw.

<sup>28</sup> Azlaməna gəl tasaka à gəl, tadəha sləray la ahəl aŋatà, kà atà aŋa mazlak azlauwana tanəkudə tatak babay.

<sup>29</sup> Pəhàw kà azlagay uwana tazigəŋ azladza anik, awkà kapəhaw azlagay deydayga aw; la tetəvi aŋa Zəzagəla la ama kà, pəhàw kà azlagay uwana azladza taslay kà aŋa matsəbal sləm lela.

<sup>30</sup> Kavàw ŋgərpa à Masasəfok Zəzagəla, uwana la ləv aŋkul la tsəh aw. Masasəfok uwaga kà, masəlay uwana Zəzagəla afà à akul à vok, kà masla mapəhla ala kà akul azlaaŋha. Apəhla ala babay kà bawbaw, kà adəbəl anu aŋa tətəwa.

<sup>31</sup> Səwla azlatatak dəhakakga à uda la ləv aŋkul la tsəh gesina la maf dza à ləv à abà la mapak ləv. Kabayaw vok gay aw, katsakaw vok magofəhay à gəl aw, ŋgaha bay, kagaw azlaməna makəsafər aw.

<sup>32</sup> Gəw tələmna la slaka azladza anik, dəhàw delga à azladza anik babay aya, matsəhawwan à vok ala, kà à akul à akul, kà tatak uwana Kristu

---

✧ 4:24 4.24 1Musa 1.26 ✧ 4:25 4.25 Zakari 8.16 ✧ 4:26 4.26 Mahabay 4.4

adəhən kà ankul.

## 5

### *Maday la uƒaka la abà*

<sup>1</sup> Lagonay, kagaw azlabəza anja Zəzagəla, uwana awoya akul. Tsa kiya uwanay kà, gəw bokuba masla.

<sup>2</sup> La azlatatak gesina uwana la abà kadəhaw à wan kà, wòyàw azlaməna magay ankul bokuba uwana Kristu awoya anu. Mamətsay uwana akəs kà, kà masla mapakay bokuba tatak matuwulla à anu à gəl, uwana akəs à Zəzagəla à gəl.✧

<sup>3</sup> Lagwa kà, kagaw azladza anja Zəzagəla. Kadəhaw mabila la azlatatak mawisiga anik anik babay aya aw. Kafaw yewdi à tatak anja azladza à tsəh aw. Baməraka bə mapəh gay lakəl anja kà, kapəhaw aw, ziruwi.

<sup>4</sup> Delga kà anja mapəh azlagay ziruwiga aw, kusoŋu, ŋgaha la azlamatsakasl à gay deydayga kà delga aw. ‘Kikay’, gòdàw kà à Zəzagəla pəra kà tatak uwana adəhən.

<sup>5</sup> Səlàw kà, azlaməna mabila, ŋgaha la azlaməna madəh tsəhay tatak mawisiga uwaga, azlauwana tafa yewdi à tatak anja azladza à vok, la azlaməna masləkaw mazlazlay, la azlaməna huŋwa kà atə babay, tadəbəza makoray anja Zəzagəla la anja Kristu tetuwa aw, kà uwana azlatatak uwaga tahəd à atə à adi dəduwa gay Zəzagəla.

<sup>6</sup> Azladza tavavara akul la azlagay deydayga aw, kà azlatatak mawisiga uwaga la uwana

---

✧ 5:2 5.2 2Musa 29.18; Mahabay 40.6



Zəzagəla apakà ləv, ɲgaha apaka ləv gesina lakəl aɲa azlauwana takweska gay aɲha.

<sup>7</sup> Kità kà, katapaw ahàl à kəsɫad̥ à abà akul nna aw.

<sup>8</sup> Uwarà kà akul la mələs la abà. Ama lagonay kà, akul la uɟaka la abà, kà uwana akul azlaaɲa Sufəl Yesu. Kiya uwaga kà, nəfaw maday aɲa azlauwana atà la uɟaka la abà.

<sup>9</sup> Uwana gəgod̥ uwaga kà, kà uwana uɟaka kà avà azlatatak delga gesina, azlatatak dziriga, ɲgaha azlatatak dzəba aɲha səla aw gə.

<sup>10</sup> Wəd̥aw vok à uda, kà akul aɲa masəl azlatatak uwana akəs à Sufəl Zəzagəla à gəl.

<sup>11</sup> Kafaw ahàl aɲkul à sləray aɲa azladza uwana à abà, tad̥ah sləray mələs aw. Ama pəhəwatàla sləray mawisiga aɲatà, uwana tafehəɲ la dazuwaya.

<sup>12</sup> Azlatatak uwana tafehəɲ la gəl la gəl kà kiya katsal à gay aw, ziruwi.

<sup>13</sup> Baɲa tapəhla azlatatak uwaga ala gesina la paraka kà, kanəɲaw madz à ahəɲ aɲatà.

<sup>14</sup> Kà uwana dèwdèw tatak uwana adapəhla vok ala, kà uɟaka. Gay gə la uwaga à uwana tagòd̥:

'Tsən ala à kak uwana kadzehàl,  
Sà à afik la mamətsay la abà,  
Kà Kristu aɲa mav à ka uɟaka!'

<sup>15</sup> Kiya uwaga kà, akul kà ɟahəwwəɲ kà delga pəra, kəla kaslā gesina, ɟahəw haɲkəli la maday aɲkul, kadaw bokuba maday aɲa azladza uwana tasəl tatak aw aw, ama dāw kà bokuba azladza matsihilaga.

16 La mələ uwanay azladza tadəh azlatatak mawisiga anjvaw kà, akul kà, dəhàwàŋ kà delga pəra kəla kaslā gesina.

17 Kagaw azlakusonju aw, ama fəw sləm à ahəŋ kà matsən tatak uwana asa à Sufəl gami kà madehəŋ.

18 Guzu akad' à akul aw, kawisaw vok ankul ala aw. Gəw kà say mahənlaga la Masasəđok Zəzagəla pəra.

19 Həbàw azlamahabay anja Zəzagəla, ŋgaha azlamahabay anik, uwana Masasəđok avà à akul. Həbàw uwaga à Sufəl gami, zləbàw masla la ləv ankul gesina.

20 Kikay, gəđəw à Zəzagəla Baba, kà azlatatak gesina la sləm anja Sufəl gami Yesu Kristu. Kikay, gəđəwwal la kaslā gesina.

### *Azlamis la azlazil*

21 Akul uwana kadiŋaw gəl à Yesu Kristu à vok, kəsəw vok gay la ahəl ala kà akul à akul, bokuba uwana kadəhəwəŋ à Kristu.

22 Akul azlamis, kəsəw gəl à ahəŋ la huma anja azlazil ankul, kiya uwana kakəsaw gay anja Sufəl Yesu.

23 Kà uwana zil kà sufəl anja mis anja, bokuba Kristu uwana Sufəl anja maham à ahəŋ mənə madiŋal gəl à vok. Kristu la uwana gəl gə, maham à ahəŋ mənə madiŋal gəl à vok kà, kà vok anja, ŋgaha masla la uwana masla abəl atə.

24 Tsa baŋa kiya uwanay kà, azlamis takəsa gəl à azlazil anjatə à ahəŋ lela bokuba maham à ahəŋ mənə gay Zəzagəla, uwana akəs à gəl à Yesu Kristu à ahəŋ.

<sup>25</sup> Akul azlazil, wòyàw azlamis aṅkul babay, bokuba Yesu Kristu uwana awoya azladza aṅha, ṅgaha amèts kà aṅatà.

<sup>26</sup> Amèts, kà maham à ahəṅ məna gay Zəzagəla aṅa magay aṅa Zəzagəla aṅa tetuwa. Apalləṅ ala la iyaw ṅgaha la gay aṅha. Kiya uwaga taga tsikaslagà kà Zəzagəla.

<sup>27</sup> Kà uwana asal kà atsa à waṅ à huma aṅha, la mazləḃay kokudfa aləh, tsidfaṅa lela, kokudfa mawisiga, sərdaka kokudfa madəḃani à tatak anik.

<sup>28</sup> Azlazil à bay kà kiya uwaga. Akul azlazil, wòyàw aṅkul bokuba uwana kawoyaw gəl aṅkul, dza uwana awoya mis aṅha kà, awoya gəl aṅha babay.

<sup>29</sup> Dza la ahəṅ, aslala vok apəsew vok aṅha aw, say avəl tatak may, afal sləm lela bokuba uwana Kristu afa sləm à azlaməna maham à ahəṅ məna gay Zəzagəla.

<sup>30</sup> Kà uwana anu gesina, mədagay bokuba vok aṅha, bokuba uwana tatsetsər à wakitə Zəzagəla à abà:

<sup>31</sup> 'Kà uwaga zil asak baba aṅha la iyà aṅha, kà atà aṅa maham gay à vok la mis aṅha, atà səla aya aw, tapakà vok tekula.'☆

<sup>32</sup> Gay uwanay kà atapànula tatak dzəḃa aṅha səla aw gə. Apəhay kà lakəl aṅa Kristu la maham à ahəṅ məna madiṅal gəl à vok aṅha.

<sup>33</sup> Kiya uwaga kà, aṅkul babay. Kəla uwa-beyuwi aṅkul awoya mis aṅha, bokuba uwana awoya gəl aṅha. Azlamis kəsàw gay aṅa azlazil aṅkul.

---

☆ 5:31 5.31 1Musa 2.24

## 6

### *Azlabəza la azlababa aṅatà*

<sup>1</sup> Azlabəza, kəsàw gay aṅa azlababa aṅkul la azlaiyà aṅkul. Delga kà azlauwana tahamà gay à vok la Sufəl Yesu tadfehəṅ kiya uwanay.

<sup>2</sup> Tekula aṅa azlamapəhay agodʼ:

'Kəs gay aṅa baba la iyà aṅak!'

Mapəhay uwaga kà mapəhay matera, uwana Zəzagəla azàṅ à uwana à adi, apəh à ahəṅ.

<sup>3</sup> Uwaga agòdʼ kà:

'Baṅa kasləkaw atà kà, adagay delga kà aṅak, kadàsafay mənṅa la gudəṅ uwanay la vok.'<sup>☆</sup>

<sup>4</sup> Akul azlababa aṅa azlabəza, kadàhawla ləv à azlabəza aṅkul à huɖ aw, dzadzaraw atà lela. Tapawatàla azlatatak, tsetsehawatàla, bokuba uwana Sufəl Yesu apəh à akul ala tetəvi.

### *Azlamayà la azlaməṅga aṅatà*

<sup>5</sup> Azlamayà kəsàw gay aṅa azlaməṅga aṅkul la gudəṅ uwanay la vok. Tsənàw atà. Ṅgaha hòyàw yewdi aṅa atà, sèklàw la huma aṅatà, ɖahàw sləray la ləv tekula. Aṅṅa kiya uwaga kà, kakəsaw Kristu.

<sup>6</sup> Kadàhaw sləray kà huma yewdi aṅatà pəra bokuba aṅa azlauwana asa atà kà azladza aṅa mazləb atà aw. Sèlàw kà, akul azlaməna sləray aṅa Kristu, ṅgaha ɖahàw azlatatak uwana asa à Zəzagəla gesina la ləv tekula.

<sup>☆</sup> 6:3 6.3 2Musa 20.12; 5Musa 5.16

<sup>7</sup> Dahàw sləray la ləv tekula bokuba uwana naka kadahaw sləray aña Kristu, awkà bokuba uwana kadahaw sləray aña azladza aw.

<sup>8</sup> Səlàw kà, kəla azlatatak delga, uwana dza adehəŋ kà, Sufəl Yesu Kristu adəpələl. Adəgay mayà, adəgay masla makor gəl.

<sup>9</sup> Akul azlaməŋga aña azlamayà, dəhàw delga à azlamayà aŋkul babay, kafaw atà gasa à gəl aw, kà uwana kasəlaw kà, gesina aŋkul kà, akul aña madzahaga tekula uwana la zagəla la afik. Masla kà avah dza mavəhay aw.✧

### *Kazlaŋa aña guvəl*

<sup>10</sup> Gay gulo uwana asa à gi makədalla gəl kà, gəw la ndzəda la ahəl aña Sufəl gami, la ndzəda məŋga aŋha la abà.

<sup>11</sup> Hələw kazlaŋa aña guvəl uwana Zəzagəla abək à akul gesina, kəsəwwəŋ la ahəl, kà akul aña mapalla guvəl la seteni, kà aña seteni apapat akul, kà akul aña mahəl la ahəŋ la masla.

<sup>12</sup> Guvəl uwana məpay kà, məpay kà la azladza aw, məpay kà la azlamasasəfok mawisiga, ŋgaha la azlasufəl aŋatà, uwana takor gudəŋ à vok mawisiga uwanay, məpa guvəl la azlatatak mawisiga gesina, uwana atà la ndzəda la afad la abà la zagəla.

<sup>13</sup> Hələw kazlaŋa aña guvəl, uwana Zəzagəla abək à akul gesina, baŋa guvəl uwana akəl akəl gə, kà akul aña mahəl la ahəŋ. Atà aña magəd ndzəda à afik, ŋgaha kà aŋkul aña masakala slaka aw.

14 Kità kà, dəhàw vok à ahəŋ, gəw azladza dziriga, azlatatak dziriga kà kalkal la parapara, uwana kawadla vok ala nəts, kà akul aŋa madəh vok à ahəŋ lela. Dəw la tetəvi dziriga aŋa Zəzagəla la ama, kà uwana baŋa kadahawwan kiya uwaga kà, adapakay kà bokuba slarapay makəla, uwana kawadəhawla vok ala, kà madz akul à ama.

15 Zəw gay marabəŋ, uwana av lapiya à azladza kokudə may vok, uwaga kà kalkal bokuba uwana kabəkaw kwimik à asik kà maday la lela la tetəvi aŋa Zəzagəla la tsəh.

16 Vəw ləv aŋkul à Sufəl Yesu la kaslə gesina, bokuba uwana guloku aga akul la ahəl, kà godam uwana seteni amal à wan, aŋa məbəz akul aw. Bəməraka magur adagay la godam uwaga lakəl bay, kà guloku adzalla à ama.

17 Tatak uwana Zəzagəla atəfla à akul kà kalkal huməz gəl aŋa guvəl, uwana tafa à gəl kà madz à gəl à ama, ŋaha zəbàw katsakar aŋa Masasədok, uwana Zəzagəla avà à akul babay, uwaga kà gay Zəzagəla.✧

18 Dəvəw kudə à Zəzagəla la ləv tekula la kaslə gesina, kələw gay la ndzəda aŋa Masasədok. Dzəw à ahəŋ la adi, karuwaw vok ahəŋ aw, dəvəw kudə koksikoksi, kà azladza aŋa Zəzagəla gesina.

19 Dəvəw kudə à Zəzagəla kà aŋulo babay, kà Zəzagəla aŋa mav à gi gay dziriga uwana gədəpəhay, ŋaha kà gi aŋa maz gay marabəŋ kokudə guba, kà gi aŋa məfətal à adi ala la

---

✧ 6:17 6:17 Yesayya 11.5; 52.7; 59.17

paraka.

<sup>20</sup> Kà gay marabəŋ uwaga Yesu Kristu afà gi à ahəŋ, kà masla masləl gi aŋha, kà gi aŋa mad maziŋ à azladza anik, baməraaka gədagay la daŋay bay kà, kà guba aŋa makəs gi aw, kà gi aŋa mapəhay la dazuwaya, bokuba uwana asa à Zəzagəla gəpəhay.

*Ayyi makəf gəl à ahəŋ*

<sup>21</sup> Tisik, deda gami uwana məwoyaŋ, adàh sləray aŋa Sufəl gami la ahəl səla, adəpəh à akul madz à ahəŋ gulo, kà akul aŋa masəl uwana gədeheŋ gesina.

<sup>22</sup> Uwana gəsləl masla à slaka aŋkul kà, kà akul aŋa masəl madz à ahəŋ gami, ŋgaha kà masla aŋa madzərədəh akul à uda babay.

<sup>23</sup> Zəzagəla Baba, la Sufəl gami Yesu Kristu tavà à akul lapiya, à akul azladeda gesina kà, kasələw mawoy vok kà akul à akul, ŋgaha kadiŋaw gəl à Yesu Kristu à vok.

<sup>24</sup> Vok mahamay aŋa Zəzagəla aŋay la azladza uwana tawoya Sufəl gami Yesu Kristu, la masal uwana adəv à gay aw.

**Wakità Zəzagəla Wakitə Aŋa Makəs Vok  
Slawda Mawga (Cameroun)  
Matal: Wakitə Zəzagəla Wakitə Aŋa Makəs Vok  
Slawda Mawga (Cameroun) (New Testament)**

copyright © 2019 Wycliffe Bible Translators, Inc.

Language: (Matal)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 28 Dec 2024 from source  
files dated 29 Jan 2022

03efbf2f-98ca-5534-8610-0be3a8c4b974